

# DOMENIE IV DI CORESIME

## Jutoris pe Liturgjie

Domenie, ai 22 di Març dal 2020

*Alore Gjesù ur vierzè la ment par lâ a font des Scrituris* (Lc. 24, 45)

### Vite - Bibie - Popul

pre Antoni Beline e une sô opinion di îr - par fânus rifleti vuê

\* \* \*

### La Bibie no scarte nuie dal popul - ma e ten cont di dut

*Come pe Bibie*, ancje tal nestri patrimoni culturâl *des etniis in Friûl* nol è nuie ce scartâ, che dut al è util par cognossi la nestre storie e par cognossinus nô. Partant e je impuartante la poesie, il cjant, la conte, la storie, i proverbis, lis costumancis, il mont religjôs, l'ambient antropologjic, lis reluciiis architetonichis, ce ch'al è restât dal nestri stamp economic, dal nestri artesanât e cetera.

Dut chest patrimoni al è la nestre Bibie. E come la Bibie tes mans de comunitât e devente un libri vîf, cussì la storie, vivude de nestre cussience comunitarie, e devente sostance dal nestri vivi di vuê.

Se no rivin chi ma si fermìn a rude ricerce folcloristiche, dut il nestri lavôr al devente un cirî vuessam tal cimiteri. In chest câs, miôr nuie, parcè che i vues dai muarts a parin bon sot tiere. Se no àn une lapide o une crôs che ju cuvierç, si pò contentâsi ancje di un bâr di jerbe. Baste ch'a sedin taponâts. E come ch'a esistin sacrilegjos pai cristians, cussì a esistin ancje sacrilegjos culturâi.

*Furtunât il popul che al è il Signôr il so Diu - par une leture sapienziâl de Bibie, p. 35*

\* \* \*

*Ancje cheste domenie nus cjate cu lis glesiis viertis ma vueitis, cence il pan de Comunitât e de Eucaristie. A onôr dal vêr, nol è che prime di cumò tes glesiis e fos stade grande fole.*

*Su chest "desert dal sacri", cualchi lengate e à viodût atualizât il verset dal profete Isaie li che il Signôr al dîs: Finîtle di quartâmi oblazions che no mi van... no sopuarti inicitâts e fiestis grandis... La mê anime e à in asse lis vuestris solenitâts; a son par me un pêo o soi stof di sopuartâlis... Ancje cuant che o multiplicais la preiere, jo no scolti gran... (1, 13-15).*

*E cussì, a disin lis lengatis, il Coronavirus al à mandât fûr di glesie chei che no volevin capîle.*

*Altris, int che si sint par ben, a sentenziin: Constatât che i fedêi a son un taco chel altri in glesie, ma ognun par cont so fûr di glesie, cumò il virus, par fâ capî che la robe no va, al fâs stâ separâts almancul di un metro ancje in cjase...*

*... Lengatis !...*

*Ma vignìn al vanzeli di vuê li che Gjesù biel passant, al viodè un om ch'al jere nassût vuarp. Cheste vicende si concludarà cu lis peraulis dal Signôr: Jo o soi vignût in chest mont par fâ sentence: par che chei che no viodin a viodin e chei ch'a viodin a deventin vuarps.*

*Il Coronavirus, in chest câs, nus mole une sonore sberle: di fat, la nestre societât e jere strasigure di viodi, di pontificâ, di vê la ultime peraule, di paronâ e di sfrutâ il mont intîr e a colp o sin ca, che no savìn nancje nô li che si cjatìn e li che o larìn; o sin duçj vuarps.*

*Al è rivât il moment dai grancj ripensaments; lis circostancis, al di là e al di fûr dal virus, nus palesin in ogni maniere e in ogni cjamp lis nestrîs svuarbetâts.*

*Però, rivarìno a metisi ancje sul troi dal Signôr? Parcè che, no si scjampe: pai vuarps, al è in chê peraule e in chel spirt la lûs dal mont.*

*Se o sin dongje dal Signôr, ancje tal marum di vuê o podìn dî cun fiducia:*

**I**ndalegriti, Gjerusalem,  
e ducj vualtris che i volês ben daiti dongje.  
Gjoldêt plui ch'o podês cun jê, ducj vualtris ch'o vês patît par jê:  
saciaitsi de bondance de vuestre consolazion.  
**No si dîs** Glorie a Diu.

### **Colete**

Diu, che midiant dal to Verbo  
tu âs riconciliât cun te in maniere straordenarie la gjernazie umane,  
dai al popul cristian la gracie  
di cori cun devozion pronte e cun fede vive  
viers des fiestis ch'a stan par rivâ.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### **PRIME LETURE**

**1 Sam 16,1.4.6-7.10-13**

**David al è onzût re di Israel.**

*Tal vanzeli de domenie stade, une samaritane pôc di sest nus à fat strade al Salvadôr dal mont; vuê un vuarp che si domandavin se a àn pecjât, lui o i siei gjenitôrs, nus mene a Crist; e cussi in cheste leture, il plui piçul e inespert de vite al devente re e soledut liberadôr dal popul.*

*Chest al è un troi costant dai intervents di Diu te nestre vite e storie, dome che noaltris o stentìn a jentrâ in chel spirt e sieltis che a jerin ancje spirt e sieltis di Gjesù.*

*Al scrîf S. Pauli: Diu al à sielzude chê che e je matetât dal mont... chê che e je debolece... ce che tal mont nol à nissun valôr e ce che al è sbeleât e ce che nol è nuie par disfâ lis robis che a son. (Cf 1 Cor 27-29).*

*E ce vino di dî? Sì, Pari, parcè che cussi ti à plasût a ti (Mt 11, 26).*

### **Dal prin libri di Samuel**

In chei dîs, il Signôr i disè a Samuel: «Jemple di vueli il to cuar e va! Ti mandi di Jesse di Betlem, parcè che mi soi sielzût un re framieç dai siei fîs». Samuel al fasè ce che il Signôr i veve ordenât. Cuant che a rivarin e che Samuel al lumà Eliab, dissal dentri di sè: «Sigûr che il Signôr al à denant di sè il so consacrât!». Ma il Signôr i disè a Samuel: «No sta lassâti inceâ dal so aspjet ni parcè che al è un toc di om, che jo lu ai scartât. Jo no cjali ce ch'al cjale l'om, parcè che l'om al cjale l'aparince ma il Signôr al cjale il cûr». Jesse al fasè passâ denant di Samuel i siei siet fîs, ma Samuel i disè a Jesse: «Il Signôr no 'nd à sielzût nissun di chescj chi». I domandà a Jesse: «No âstu nissun altri fi?» e chel altri i rispuindè: «Al sarès ancjemò il plui piçul, ch'al è a passon cu la mandrie». Alore Samuel i disè a Jesse: «Mandimal a clamâ; no si sentarìn in taule fintremai che nol è rivât ancje lui». Jesse lu mandà a clamâ: al jere rossit, cun doi vôi che ce, e tant ben fat che mai. E il Signôr al disè: «Jeve sù e onzilu, ch'al è lui!». Samuel al cjolè il cuar dal vueli e lu onzè a preference dai siei fradis. Il spirt dal Signôr al plombà parsore di David tacant d'in chê dì in ca.  
Peraule di Diu.

### **SALM RESPONSORIÂL**

**dal Salm 22**

*Il cristian no simpri al capis; di fat si lei tal salm: ... Ce grivis che a son par me i tiei pinsîrs, o Diu, / ce grant che al è il lôr numar! / A son plui dal savalon se mi met a contâju; / rivât da pît, ancjemò cun te mi cjati. (Salm 139, 17-18).*

*Però ducj nô o savìn che il Pastôr al larà a cirî la piore che si è pierdude fin che no le cjate (cf. Lc 15, 4).*

*Par chest o podìn dî:*

**R. Il Signôr al è il gno pastôr: no mi mancjarà nuie.**

*Se cjantât: Il cjant dai salms responsoriâi, p. 24.*

Mi fâs polsâ là che i passons a sverdein,  
mi mene là ch'a son aghis frescjis.  
Al tire sù la mê vite,  
in gracie dal so non  
mi mene par trois di justizie. **R.**

Ancje s'ò ves di cjaminâ par une foranate scure,  
di nissun mâl no varès pôre,  
parcè che tu mi sês dongje;  
il to baston e la tô vuiscje  
a son lôr che mi parin. **R.**

Tu prontis denant di me une taulade  
presince dai miei nemîs,  
il gno cjâf tu âs onzût di vueli  
e il gno bocâl al è plen ch'al stranfe. **R.**

Propit, bontât e boncûr mi compagnaràn  
ducj i dîs de mê vite,  
te cjase dal Signôr par une vore di agns o restarai. **R.**

**SECONDE LETURE**

**Ef 5,8-14**

**Resuris dai muarts e Crist al luserà sore di te.**

*Tai notiziaris di chestis zornadis al slargje il cûr sintî di dutis lis personis che, cence badâ a se stessis, si dedichin fra contaminâts e malâts cun ogni sorte di bontât, di justizie e di veretât.*

*Ma, propit culî in Italie si sint ancje l'incontrari e tai Stât Unîts al è adiriture in aument il furnîsi di armis par protezisi di probabii agressôrs.*

*L'Apuestul nus vise: Sielzêt ce che i plâs a Diu.*

**De letare di san Pauli apuestul ai Efesins**

Fradis, o jeris scûr ma cumò o sês lûs tal Signôr: compuartaitsi come fîs de lûs. La lûs e bute ogni sorte di bontât, di justizie e di veretât. Sielzêt ce che i plâs a Diu. No stait a fâ leghe cu lis voris dal scûr, che no butin, ma anzit rifudaitlis, parcè che ce che lôr a cumbinin di scuindon al è di vergognâsi dome a contâlu; ma dut ce ch'al è condanât, al ven palesât de lûs. Di fat dut ce ch'al è palesât al è lûs. Par chel si dîs:  
«Dismoviti, tu che tu duarmis,  
resuris dai muarts  
e Crist al luserà sore di te».  
Peraule di Diu.

**CJANT AL VANZELI**

**cf. Zn 8,12**

**R. Glorie a ti, o Crist, Verbo di Diu!**

Jo o soi la lûs dal mont, al dîs il Signôr,  
chel che al ven daûr di me al varà la lûs de vite.

**R. Glorie a ti, o Crist, Verbo di Diu!**

**VANZELI**

**Zn 9,1-41**

**Al lè, si lavà e al tornà indaûr ch'al viodeve.**

*Come che al è sucedût tal episodi de samaritane cussi ancje culi al sarà un puar biât a condusinus; come al so solit, l'evangelist al sa il so fat tal fânus rivâ a Crist lûs dal mont.*

..... Chei che a scuodevin lis tassis e i pecjadôrs i levin dongje par scoltâlu... I fariseus e i dotôrs de leç a bruntulavin disint: “Chel chi al acete i pecjadôrs e al mangje cun lôr” (Lc 15, 1).

Un om, che i disin Gjesù... Ur rispuindè: Al è un profete... Se chel om nol fos di Diu, nol varès rivât a fâ nuie... Crodistu tu tal Fi dal om?... Al è chel ch'al fevele cun te... Al disè: “O crôt, Signôr”, e si butà in zenoglon denant di lui.

*La domande di vuê e jê: Sino par câs vuarps ancje nô?*

### **Dal vanzeli seont Zuan**

In chê volte, Gjesù biel passant, al viodè un om ch'al jere nassût vuarp. I siei dissepui i domandarin: «Rabî, cui aial pecjât, lui o i siei gjenitôrs, ch'al è nassût vuarp?». Ur rispuindè Gjesù: «Nol à pecjât ni lui ni i siei gjenitôrs, ma par che si palesin in lui lis oparis di Diu. O vin di fâ lis oparis di chel che mi à mandât fin ch'al è di. Po e ven la gnot, cuant che nissun nol pues plui operâ. Fintremai ch'o soi tal mont, o soi la lûs dal mont». Al spudà par tiere e al fasè un piç di pantan cu la salive e al slargjà il pantan sui vôi di lui. E i disè: «Va laviti te vascje di Siloe» (ch'al vûl dî “mandât”). Lui al lè, si lavà, e al tornà indaûr ch'al viodeve. I vicins e chei che lu vevin viodût prime a cirî la carità a disevin: «No esal chel ch'al jere sentât a cirî?». Altris a disevin: «Po no lafè! Al è un che i semee». Lui però al diseve: «O soi propit jo!». I disevin alore: «Cemût mai che ti son vierzûts i vôi?». Lui ur rispuindè: «Un om, che i disin Gjesù, al à fat un piç di pantan e mal à slargjât sui vôi e mi à dit: “Va a Siloe e laviti”. Jo o soi lât, mi soi lavât e o ai tacât a viodi». I rispunderin: «E lui dulà esal?». Ur dîs: «No sai».

Chel che prime al jere vuarp, lu menin dai fariseos. E jere sabide la di che Gjesù al fasè il pantan e i vierzè i vôi. Ancje i fariseos lu interpelavin sul mût ch'al veve tornât a viodi. Ur disè: «Mi à metût pantan sui vôi, mi soi lavât e o viôt». Alore cualchi fariseo al diseve: «Chest om nol ven di Diu, parcè che nol rispiete la sabide». Altris però a disevin: «Cemût puedial un, s'al è pecjadôr, fâ spièi di cheste sorte?». E a jerin dividûts fra di lôr. Alore a tornin a dî al vuarp: «E tu, ce disistu di lui, pal fat che ti à vierzût i vôi?». Ur rispuindè: «Al è un profete».

Però i gjudeos no crodevin che lui al fos stât vuarp e al ves tornât a viodi, fin che no clamarin i gjenitôrs di chel ch'al veve tornât a viodi e ju interpelarin: «Chest chi esal propit vuestri fi, chel che vualtris o disês ch'al jere nassût vuarp? E cemût mai che cumò al viôt?». Ur rispunderin i siei gjenitôrs: «Nô o savin che chel chi al è nestri fi e ch'al è nassût vuarp. Cemût mai che cumò al viôt, nô no lu savin e nancje no savin cui che i à vierzûts i vôi. Domandaitlu a lui, ch'al à la sô etât; al fevelarà lui sul so cont». I siei gjenitôrs a disevin cussi parcè che a vevin pôre dai gjudeos. Di fat i gjudeos si jerin za metûts d'acuardi che, se cualchidun lu ves ricognossût come Crist, lu varessin butât fûr de sinagoghe. Par chel i siei gjenitôrs a diserin: «Al à la sô etât. Domandaitlu a lui!».

Alore a clamarin pe seconde volte l'om ch'al jere stât vuarp e i diserin: «Da glorie a Diu! Nô o savin che chest om al è un pecjadôr». Ur rispuindè: «S'al è un pecjadôr jo no lu sai. O sai dome une robe: o jeri vuarp e cumò o viôt». I diserin: «Ce ti aial fat? Cemût ti aial vierzûts i vôi?». Ur rispuindè: «Us al ai za dit e no mi vês scoltât. Parcè volêso sintîlu ancjemò une volte? Volêso forsit diventâ siei dissepui ancje vualtris?». Alore lu sofegarin di improperis e i diserin: «Tu sês tu dissepul di chel li; nô o sin dissepui di Mosè. Nô o savin che a Mosè i à fevelât Diu, ma chel chi no savin dontri ch'al è». L'om ur rispuindè: «Al è propit chest il biel: che no savês di dulà ch'al è, epûr mi à vierzûts i vôi. Nô o savin che Diu nol scolte i pecjadôrs, ma se un al à religjon e al fâs la sô volontât, chel lu scolte. Di cuant che mont al è mont, no si à mai sintût a dî che un al vedi vierzûts i vôi di un nassût vuarp. Se chel om nol fos di Diu, nol varès rivât a fâ nuie». I rispunderin: «Tu sês nassût dut intîr tai pecjâts e tu pratindis di insegnânus a nô?». E lu pararin fûr.

Gjesù al sinti che lu vevin parât fûr e, incuintranlu, i disè: «Crodistu tu tal Fi dal om?». I rispuindè: «Ma cui esal, Signôr, par ch'o crodi in lui?». I disè Gjesù: «Tu lu âs za viodût: al è chel ch'al fevele cun te». Al disè: «O crôt, Signôr», e si butà in zenoglon denant di lui.

Dissal alore Gjesù: «Jo o soi vignût in chest mont par fâ sentence: par che chei che no viodin a viodin e chei ch'a viodin a diventin vuarps». Un pôcs di fariseos ch'a jerin cun lui a sintirin chestis peraulis e i diserin: «Sino par câs vuarps ancje nô?». Gjesù ur disè: «S'ò fossis vuarps, no varessis pecjât. Ma vualtris o disês: "Nô o viodin". E il vuestri pecjât al reste».

Peraule dal Signôr.

**Si dîs** O crôt.

### **Su lis ufiertis**

Ti ufrìn contents, Signôr,  
i regâi de redenzie eterne  
e ti preìn cun umiltât di fâusai celebrâ cun fede  
e di presentâtai come ch'a mertin pe salvece dal mont.  
Par Crist nestri Signôr.

### **Antifone a la comunion**

**cf. Zn 9,11**

Il Signôr al à slargjât un piç di pantan sui miei vôi:  
o soi lâ, mi soi lavât, o ai tacât a viodi, o ai crodût in Diu.

### **Daspò de comunion**

Diu, che tu i fasis lûs a ogni om ch'al ven in chest mont,  
fâs lûs, par plasê, tai nestris cûrs cu la gracie dal to sflandôr  
par ch'ò podedin pensâ simpri robis degnis  
e ch'a plasedin a la tô maiestât e volêti ben cun scletece.  
Par Crist nestri Signôr.

\* \* \*

### **Cjants pal timp di Coresime**

- Parce Domine, *n. 125*;
- Signore guardaci nel tuo amore, *n. 126*;
- O muse insanganade, *n. 128*;
- O capo insanguinato, *n. 129*;
- O Signôr a schene plète, *n. 130*;
- Viers la cjase amade, o Pari, *n. 131*;
- Crist, Fi di Diu, ve dûl di nô, *n. 132*;
- Gno Diu, mê ruvîs là che mi pari, *n. 133*;
- Se il timp che Diu ti preste, *n. 134*;
- Come a l'aghe de fontane, *n. 135*;
- Quanta sete nel mio cuore, *n. 136*;
- Alla tua mensa, amato Salvatore, *n. 137*.

### **Salm dal Miserere, n. 50.**

- Misere mei Deus, *n. 231*;
- Ve dûl di me, *n. 252*; *n. 253*;

**Salm 22, Il Signôr al è il gno pastôr, n. 241;**

**Salm 26, Il Signôr al è la mê lûs, n. 244.**

**Strade de crôs, n. 138;**

**Via crucis, p. 285.**

**Tal libri Hosanna**, si puedin cjatâ ancjemò altris cjants e salms adats al timp di Coresime.

\* \* \*

**Miercus 25: inte nunziazion dal Signôr**

*Antifone di jentrade de Messe -*

**Jentrant tal mont, il Signôr al à dit:**

**Ve, o ven jo a fâ, Diu, la tô volontât.**

*Eb 10,5.7*

\* \* \*

***Non sprecate questi giorni difficili.***

*Pape Francesc*

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*

\* *Par domandâ chescj libris scrîvêt a [info@glesiefurlane.org](mailto:info@glesiefurlane.org)*